



遠足

「遠足」這個語詞，佇最近這幾十年真罕得聽著，這馬學校擺講做「校外教學」，毋過若佇五十年前，遠足是庄跤學生上愛的活動。

1960年代，逐學期學校擺會辦一擺遠足，懸年級的學生，會當坐車去較遠的所在迫迫；啊若中低年級的學生，學校會安排佇附近，路程袂超過兩點鐘的學校來做交流。彼時陣，阮學校附近，符合這個條件的所在，有七間學校恰一个抽水站的風景點，拄好會當予中低年級的學生，輪流去遠足。彼當時庄跤所在，經濟無好，學生囡仔攏嘛褪赤跤去學校，無人穿鞋，附近的路攏無鋪打馬膠，沿路攏是坎坎坷坷的石頭仔路。彼款路草，若予這馬的學生來行，相信無到一成的人行會到。

雖然遠足真忝，是按怎學生囡仔攏遐愛遠足咧？這是有原因的。因為遠足這工，規工攏免上課，老師嘛袂歹 tshìng-tshìng，逐家透早就紮飯包到學校，那行那開講，佢趣味咧，而且中晝閣會當享受一學期一擺食飯包的滋味。

欲出發的時，校長會特別交代，吩咐逐家著愛愛惜學校的名聲、愛有禮貌、講話毋通大聲喝，閣袂當冤家相拍，甚至影響別人上課，逐家愛歡歡喜喜去遠足，平平安安倒轉來。等校長宣佈了，各年級就肅離開學校，往目的地出發。

人講：「輸入毋輸陣，輸陣歹看面。」遠足這工，飯包內底的菜色恰穿插嘛比平常時較好，序大人閣會提淡薄仔零星錢予囡仔紮咧，按呢較袂予序細佇外口干焦會當看人食。遠足這工，有一寡生理人，會共欲賣的物件踎鐵馬頂，恰學生做伙行，等有的學生囡仔枵饑的時陣，就會當共個買枝仔冰抑是四秀仔來啖糝一下。

來到遠足的目的地，個學校的校長，會來紹介學校的歷史恰特色。等這寡基本的工課進行了後，學生就開始自由活動，會當提早食飯包，嘛會使耍尪仔標、珠仔、擲樹奶、跳索仔，逐家攏耍甲真歡喜。一直到下晡一點過矣，逐家才杳杳仔行轉去學校，結束這改予人數念的遠足。

作者：林義和

☆詞彙學習☆

【庄跤】tsng-kha：鄉下。

【褪赤跤】thng-tshiah-kha：打赤腳。光著腳，不穿鞋襪。

【打馬膠】tá-má-ka：柏油。

【坎坎坷坷】khám-khám-khiát-khiát：坎坎坷。形容道路崎嶇不平，不好走。

【忝】thiám：疲累。

【零星錢】lân-san-tsínn：零錢。

【枵饑】iau-sâi：貪吃、嘴饑。

【啖糝】tām-sám：解饑、淺嚐，為消遣用。

【擲樹奶】phiák tshiū-ling：彈橡皮筋。

【跳索仔】thiàu-soh-á：跳繩。